

趙城縣志卷之五

城池

邑之城不足志也曷言乎不足志曰嘉慶六七年間圯於水者數矣今猶未復其舊也故曰不足志也然竟可以不志乎曰謹封守嚴捍禦令之責也且完固之城保障易損壞之城保障難畧之烏可也建城何始曰始唐之麟德二年通志作元年前此無建城者乎曰有之然故址無存籍氏亦無紀也今之城猶唐之舊治乎曰明正統十四年知縣何子聰徙而東矣距舊城五里其徙之何避水患也城之制何周五里百有二十步崇二丈濠深七尺廣倍之門則四也有脩之者乎正德五年知縣于洪易堞以甃四門各建樓樓左右為角樓為窩舖浚其濠引霍泉注之環以女牆牆內外為馬路俱廣一丈然其時猶土城耳崇禎十二年知縣陳君舜始甃南北二百以甃東西則十四年知縣孫份續甃也繼此有脩之者乎

趙城縣志

卷之五

城池

一

國朝康熙三十四年以地震而圯矣改築者知縣徐容也雍正八年以歲久而又圯矣督脩者知縣談起行也其時樓則十有二也堞則十有七也窩舖則有四也東城樓曰擷

翠曰環青曰霍峯峙秀西城樓曰怡雲曰罨畫曰汾水廻
瀾南城樓曰迎禧曰望極曰簡城古治曰解愠阜財北城
樓曰瞻雲曰就日曰河東股肱曰拱衛神京何巍然翼然
也今則存者十無四五矣然則奚以不脩也曰力不贍也
晉之南當孔道者二十州縣趙爲瘠雖有廉俸僅足備供
張也且自脩築至今九十餘年圯於水又二十餘年因循
遷就以至於此今欲建城宜先固城基欲固城基宜先築
河岸爲功旣鉅需費較多歲時之補苴不足竟乃事也然
則何以處之曰予蒞任之明年請於上官矣許之而猶有
待也邑之父老環而問於予予未有以謝也此則予所爲
志之而滋慙者也